

## Von der Treu vnd Lieb

Dann gewißlich nicht also schlechlich/sonder ohne allen zweiffel/ auß einer son-  
dern verhengknusß Gottes (Mirackels weiß) geschehen/ Vñ ist also dieß Ross ein  
Instrument Gottes gewesen/ dardurch er diesen Gotlosen Keyser so jämmerlich  
hat straffen wöllen. Durch obvermeldte historias/ vermaine ich genugsam er-  
wiesen zu haben/ der Pferd Lieb vnd Treu/ so sie gegen ihren Herrn tragen: Vñ  
wil zu Beschluß dieses Capitel/ nicht mehr als noch ein Exempel fürbringen/  
dardurch ich vermain darzu thun / daß auch die Ross ihre Herrn vor Schaden  
warnen/ welches ich mit stillschweigen nit wol ombgehen kan/ Dann es ist selbst  
bey mir frembd/ habe es auch bey andern Nationen nie gehöret noch gesehen. Es  
seind noch so gar viel jar nit/ daß die Plackereyen etwas mehr im schwang gan-  
gen/ als jetzund bey vnsern zeiten geschicht/ Dazu mal sage ich/ hat man bey vns  
Ross gefunden/ die haben die art gehabt (von dannen sie auch die Bernemmer  
geheissen) daß sie auff ein halbe Meil weg/ minder oder mehr/ vernommen/  
ob einige Reutteren vor oder hinder ihnen vorhanden/ haben sie als bald ihren  
Herrn Zeichen geben / daß frembde Reutteren vmb die weg/ welche Zeichen  
dann die jenigen wol verstanden. denen solche Ross zugehört/ vnd jr art gewußt  
(man solte auch noch wol Leut finden/ die dergleichen Pf. rd gehabt/ vnd noch  
haben möchten) nach solcher andeutung hat sich einer wol können richten/ daß  
er den Schnapphanen nit hat dörffen in die Hand kommen/ so er anderst selbst  
gewölt: Vñnd bleibet also die Lieb vñnd Treu der Pferd gegen ihren Herrn/  
vnd daß sie dieselben vor Schaden warnen/ meines erachtens/ genugsam erwies-  
sen.

## Von ecklichen Rossen/ so vmb ein groß Geldt erkaufft worden.

### Das VII. Capitel.

**S**offt vñnd viel man von einem guten / schönen/  
fraidigen/ tugentsamen/ köstlichen Rosß wil singen oder sagen/  
So ist allezeit dieser Bucephalus davornen dran/ wie dann nit  
vnbillich/ Dann er ist se ein außbündt gewesen vor allen andern  
Rossen/ davon man se gehört/ so lang die Welt ist gestanden:  
Also geschieht auch hie in diesem Capitel/ welches dann von dem hohen Werck  
der Ross handelt/ vñ nit liederlich auß alle Historiis ein Exempel von so einem  
theuren Rosß/ als vñ diesem mag beygebracht werde. Diu weil ich aber wol weiß/  
daß von diesem Bucephalo (vñ sonderlich bey dem gemainen Volck) mancher-  
ley seltsame mainungen vñgehen/ was es doch für ein Ross gewesen sey: Dan der  
mehrer theil macht ein wunderbarliches Thier drauß/ dergleichen auff der Welt  
nie